

॥ मेधासूक्तम् ॥

(तैत्तिरीयारण्यकम्/प्रपाठकः - १०/अनुवाकः - ४१-४४)

मे॒धादे॒वी जु॒षमा॑णा न॒ आगा॑द्वि॒श्वार्ची॑ भ॒द्रा सु॑मन॒स्यमा॑ना। त्वया॒ जुष्टा॑ नुदमा॒ना दुरु॑क्ता॒न्
 बृ॒हद्वे॑देम वि॒दथे॑ सु॒वीराः॑। त्वया॒ जुष्टं॑ ऋषि॒र्भवति॑ देवि॒ त्वया॒ ब्रह्मा॑ऽऽग॒तश्री॑रु॒त त्वया॑।
 त्वया॒ जुष्टं॑श्चि॒त्रं वि॑न्दते वसु॒ सानो॑ जुषस्व॒ द्रवि॑णो न मेधे॥ मे॒धां म॒ इन्द्रो॑ ददातु मे॒धां
 दे॒वी सर॑स्वती। मे॒धां मे॑ अ॒श्विना॑वु॒भावाध॑त्तां पुष्क॑रस्रजा। अ॒प्सरा॑सु च॒ या मे॒धा गन्ध॑र्वेषु
 च॒ यन्मनः॑। दैवी॑ मे॒धा सर॑स्वती॒ सा मा॑ मे॒धा सु॒रभि॑र्जुषता॒ऽऽ स्वाहा॑॥ आ मा॑ मे॒धा
 सु॒रभि॑र्वि॒श्वरू॑पा हि॒रण्य॑वर्णा जग॑ती जग॒म्या। ऊ॒र्जस्व॑ती पय॑सा पि॒न्वमा॑ना॒ सा मा॑ मे॒धा
 सु॒प्रती॑का जुषन्ताम्। मयि॑ मे॒धां मयि॑ प्र॒जां मय्य॑ग्निस्तेजो॑ दधातु मयि॑ मे॒धां मयि॑ प्र॒जां
 मयी॑न्द्र इन्द्रि॒यं द॑धातु मयि॑ मे॒धां मयि॑ प्र॒जां मयि॑ सूर्यो॒ भ्राजो॑ दधातु।



generated on March 29, 2026